



Selasa 31 Mei 2022

Ogen: Lukas 17:11-17



KINITEKEN ERBAHANCA KAM MALEM



Sakit, enda sada situasi si tuhu-tuhu erbahanca geluhta la sejahtera. La saja dirinta sisakit e tapi pe anggota jabu: perbulangen, anak-anaka ntah pe orangtuata. La saja energita si terkuras, ukurta pe la tenang, senta pe keru, nggengkensa pe tuhu-tuhu latihan kal.

Ndarami tambar kujah kuje, ndarami dokter si mesinting janah kinitekenta pe teruji kal. Sabab la sitik tawaren ingan ertambar si reh, si la saja secara medis ras herbal tapi pe tambar si lit tabas-tabasna pe itawarken. Megati ijenda la sitik si tergoda, alu tujun sipenting malem pinakit. Amin bage lit ka nge kalak si paguh kinitekenna, la atena ncampurken kiniteken ras doni enda.

Renungenta wari enda nuriken kerna piga-piga kalak si gadamen. Lit teremna sepuluh kalak janahna erlebuh alu sora 'O Tuhan! Mekuah min atendu kami'. Sora enda ialoi Jesus alu nuruh ia kerina ncidahkan dirina man imam. Luar biasa itengah dalam enggo malem pinakitna ndai. Sada ibas sepuluh kalak si malem e, kenca igejabna ia malem minter ia mulihken ndahi Jesus alu muji Dibata. La kepe terkata-kataken, simulihkan enda ndai eme sekalak Samaria. Tapi si siwah kalak nari la ngata kai pe ibas kai sienggo jadi man bana. Emaka nina Jesus 'kekeken to mulihken; kinitekenndu erbahanca kam malem'. Arah kejadiin enda tangkas kal kuasa Dibata simpepalem janah la kerina kalak si malem ndai ngasup ngataken bujur. Keriahenna ukurna la iturikenna man Dibata. Payo, erlebuh ras mindo perkuah ate nge kerina ia ndai man Dibata tapi kenca datna sura-surana, la kepe kerina nginget Dibata ibas sehna sura-surana. Arah renungen enda, iajuk kita gelah ibas kerina perbeben ntah pe pinakitta, erlebuh man Dibata, mindo perkuah ateNa. Teklah pasti malem me kita.

Malem me kalak singendes man Dibata ibas kerina suinta